

# «Il Radio Rumantsch sut la marella»

■ (cp) Il Cussegl dal public SRG.R ha observà las duas emissiuns dal Radio Rumantsch (RR) «Vita e cretta» e «Profil». Plinavant ha il Cussegl dal public giuditgà per la segunda giada la moderaziun dal Radio Rumantsch e discutà il mais tematic «Ils Svizzers». La porschida sin la pagina [rtr.ch](http://rtr.ch) plascha e la seria da film cun dissegns animads «Helveticus» persvada. L'emissiun «Vita e cretta» tracta temas religios e prova da metter quels en connex cun aspects dal mintgadi. La musica da l'emissiun sa drizza ad in vast public. Tut tenor gusts e preferientschas da l'auditori procura quai magari era per vuschs criticas. L'emis-

siun «Profil» metta ina persuna en il center e persvada tras sia furma. Il concept d'emissiun prevesa in discurs cun ina persuna en tschintg parts. Tenor opiniun dal Cussegl dal public pudess la dramaturgia da l'emissiun esser anc pli dinamica. L'emissiun stat e croda en emprima lingia dentant cun il giast. Uschia è la selecziun da la persuna che vegn a pled en l'emissiun «Profil» in dals facturs ils pli purtants.

Per la segunda giada durant il 2013 ha il Cussegl dal public valità las moderaturas ed ils moderaturs dal Radio Rumantsch. Ils criteris per la valitaziun èn stads ils suandants: credibladad, flexibladad, creatividad, empatia ed abilitads

linguisticas. En egl croda che moderaturas e moderaturs da l'atgna regiun linguistica vegnan giuditgads dals commembers dal cussegl pli sever. Il cumparegl cun l'emprima valitaziun mussa in resultat levamain pli positiv. La moderaziun dal Radio Rumantsch survegn uschia en general fitg bunas notas.

En sia proxima seduta s'occupa il Cussegl dal public cun il «Sportissimo», l'emissiun da sport da la fin d'emna dal Radio Rumantsch. Ultra da quai prepara il cussegl er il Premi schurnalistic SRG.R. Il premi che vegn surdà per l'emprima giada la primavaira proxima onurescha lavurs schurnalisticas da RTR.